


**JAMHUURIYADDA SOMALILAND.**

**REPUBLIC OF SOMALILAND**



**GUDDIDA DOORASHOYINKA**

**QARANKA**

**NATIONAL ELECTORAL COMMISSION.**

# **XEERKA ANSHAXA SAXAAFADA EE DOORASHOYINKA GOLAHA WAKIILADA IYO GOLAHA DEEGANKA 2021**

## **MEDIA CODE OF CONDUCT FOR HOUSE OF REPRESENTATIVES AND LOCAL COUNCIL ELECTIONS 2021**

---

### **ARAR:**

1. Xeerkan anshaxa waxa lagu dhaqi doonaa dhammaan saxaafadda gaarka ah iyo ta dawladdu maamusho xiliga diiwaangelinta codbixiyayaasha iyo doorashooyinka isku sidkan ee Golaha Wakiilada iyo Golaha Deeganka ee 2021. Waxa uu khuseeyaa muddada ka horeysa doorashada, doorashada dhexdeeda iyo mudada ka danbaysa doorashooyinka, waxaanu dhaqangalayaa maalinta dhamaan dhinacyada uu u dhexeeyaa ay wada saxeexaan waxaanu ku eg yahay bil kadib maalinta doorashooyinka.

2. Xeerkan Anshaxa waxa ku jira ararta, waxanu dejinayaa mabaadiida guud ee ka caawinaysa saxafiyiinta in ay raacaan heerarka ugu sareeya dhinaca xirfada saxaafada iyo gudashada xilkooda, taas oo ah in ay bulshada siiyaan xog sugan si ay uga qayb-galaan doorashooyinka.

3. Waxa uu xooga saarayaa isla markaana dhawrayaa xaqa shakhsigu u leeyahay in uu xog sugan helo, waxa uu faahfaahinayaa waxyaabaha saxaafadu qabanayso, iyo waxyaabaha saraakiisha goobta, degmada iyo booliisku ay tahay in ay sameeyaan si ay saxaafada uga saacidaan gudashada shaqadooda waxana uu laf-dhabar u yahay saxaafadu in ay shariiga ku dhaqanto taas oo saxeexayaasha Xeerkani ka dhigeen heshiis dhaqangal ah.

4. Xeerkani waxa uu horseedayaa isfahan dhex mara Komishanka, xukuumadda, iyo saxaafadda si ay u aqoonsadaan mid kasta waxa laga rajaynayo, xuquuqda iyo masuuliyadaha hab bisayl ku jiro kaas oo horseedaya dhismaha seeska dimuquraadiyadeed ee dalka.

5. Waxa muhiim ah in aan Xeerkan qoraal ahaan uun la ixtiraamin, balse nuxurkiisa guud ahaan la ixtiraamo. Waa in aan loo tafsiirin Xeerkan si kooban si loo waxyeeleeyo balanqaadkiisa, oo ah in la ixtiraamo xuquuqda shakhsiyaadka,

isla markaana aan loo tafsiirin si balaadhan si ay faragelin aan loo baahnayn ugu noqoto xoriyadda rayiga ama ay ka hortagto daabeecadda danta caamka ah.

6. Waxa masuuliyadi ka saaran tahay tafatirayaasha iyo baahiyayaasha in ay u adeegsadaan Xeerka waxyaabaha la tafatirayo ha daabacnaadeen ama ha noqdeen qaar laga heli karo mareegaha iyo mida la baahiyaba. Waa in ay ka taxadaraan oo ay hubiyaan in si adag ay u dhawraan dadka saxaafada wax ku daabaca, oo ay ku jiraan kuwa aan saxafiyiinta ahayni.

7. Xeerkani waxa uu aqoonsan yahay baahiyaadka gaarka ah ee dumarka, dadka laxaadka la' xiliga doorashooyinka iyo dumarka saxafiyiinta ahba, waxa uu waydiisanayaa saraakiisha goobaha codbixinta, saraakiisha dawlada, saraakiisha xisbiyadda iyo saxaafadu guud ahaan waa in ay ka qayb qaataan hubiyaana in arrimaha dumarka si dhamays tiran loo baahiyo lana tixgasho sharafta iyo ixtiraamka dumarka saxafiyiinta ah in ay hawshooda fushadaan.

8. Si loo buuxiyo doorka saxaafada, ee ah in ay ilaaliso qaranka, waxa uu ka dalbanayaa saraakiisha doorashada in aanay saxafiyiinta is hortaagin isla markaana tixgeliyaan hubinta habsami u socodka doorashada.

9. Taas bedelkeeda saxaafada waxa laga doonayaa in ay ula dhaqanto dhamaan xogaha musharaxiinta iyo xisbiyada siyaasada dhexdhexaadnimo waxana ay ka rajaynasaaa xukuumadda in ay ku baahiyaan xogtooda saxaafadda dawladda iyo mida gaarka loo leeyahayba.

10. Xukuumaddu waa in ay ula dhaqantaa saxaafadda dawladda iyo ta madaxa banaan si siman, oo ay hagayso ahmiyadda koowaad ee ah in bulshadu hesho xog sugan. Taas bedelkeeda saxaafada waxa laga doonayaa in ay musharaxiinta iyo xisbiyada si siman ula dhaqanto.

## **MABAADI'DA GUUD EE XEERKA ANSHAXA EE SAXAAFADDA EE DOORASHADA 2021 KA:**

1. Baahinta saxaafadda wanaagsan waxa haga mihnad aqoosan ama garawsan ahmiyadda muhimka ah ee ay bulshada u hayo iyada oo xaq bulshadu ugu leedahay in ay hesho xog sugan oo ka tarjumaysa xaqiiqda oo sax ah si ay u qaadata go'aan xog-ogaalnimo ku dhisan.

2. Saxaafadda wanaagsani waa mid dheeli-tiran, iskuna miisaanta afkaarta iska soo horjeedda si ay u dheellitirto doodaha xisbiyada iyo shakhsiyaadka bulshada, siyaasiyiinta, musharixiinta IWM. Habkaasi waxa uu dhawrayaa xaqa uu qofku u leeyahay in uu helo xog run ah.
3. Baahinta saxaafadda wanaagsani waxa ay masuuliyad iska saartaa in ay ka dheeraato in ay bulshada fidno kala dhex-dhigto, mana tebisno war been abuur ah, ama nacayb ka buuxo ama hadal deel-qaaf ah.
4. Haddii barnaamij tebintiisa cidi iibsato, bulshadu waxa ay xaq u leedahay in ay ogaato aqoonsiga qofka, xisbiga ama masuulka bixiyay lacagta barnaamijka.
5. Saxaafaddu waa in ay u dhaqantaa si masuuliyadi ku dheehan tahay iyaga oo tebinaysa xaqiiqda isla markaana ka dhawrsanaysa in ay qaataan war marin habaabin samaynaya, kuwaas oo ay ku jiraan sawiro, ama haddalo deel-qaaf ah, faalo aan sax ahayn oo ka dhan ah shakhsiyaad ama xisbi ama musharax ama musharixiin.
6. Qof kastaaba waxa uu xaq u leeyahay in loo dhawro noloshiisa gaarka ah iyo nolosha qoyskiisa ee gaarka ah, gurigiisa, caafimaadkiisa iyo isgaadhsiintiisa. Baahintu waa in ay sababayn kartaa ku-xadgudubka lagu sameeyay nolosha gaarka ah ee qofka isaga oon ogolaansho laga helin.
7. Saxafiyiintu waxa ay masuuliyadni ka saaran tahay in ay baahiyaan baahiyaadka gaarka ah ee dumarka, dadka laxaadka la'aan, da' yarta iyo dadka laga tirada badan yahay iyo in ay arrintaasi u soo bandhigaan hab dheeli tiran.
8. Saxaafaddu waa in ay ka fogaataa in qofka loo aaneeyo qabiilkiisa, jinsigiisa ama xanuun maskaxiyah ah oo kale ama xaalad naafanimo.
9. Saxafiyiinta iyo sawir qaadayaashu waa in ay raacaan shuruucda xuquuqda sawirka iyo hab-raacyadooda.
10. Saxafiyiinta waxa uu waajib ka saaran yahay in ay warka ku saabsan geedi-socodka doorashada iyo ku dhawaaqista doorashada ay qaataan oo kaliya ta ka soo baxda Komishanka Doorashooyinka ee Qaranka.
11. Xogta aan saxda ahayn, marin habaabinta ama qaladaadka waxa ay u baahan yihiin in la aqoonsado, sixitaanka xogta la baahiyay/daabacay waa in loo sameeyaa

sida ugu dhakhsaha badan si looga ilaaliyo bulshadda in ay gaadhaan warbixin qaldani.

12. Waa in fursad caddaalad ah Ia siiyaa jawaab celinta xogta qaldan ee ay bixinayaan shakhsiyaad ama xisbiyo ama musharixiin marka si macquula looga dalbado waana in Ia siiyaa waqti iyo mug (space) ku filan. Mar kasta oo hay'ad war-baahineed cid dhibane ahi ka dalbato, hay'ada war-baahineedna waa in ay garawsataa.

13. Saxaafadu waa in aanay qaybin xog kasta oo dhaawacaysa sirta gaarka ah ee qofka, ama sumcadoo iyo sharaftooda dhaawacaysa.

14. Saxaafaddu waa in ay ka dheeraataa baahinta xog ku xad-gudbaysa dhawrsanaanta Diinta Islaamka.

15. Saxaafaddu waa in ay ka taxadartaa in aanay baahin xog dhaawacaysa amniga qaranka. Iyada oo taas laga duulayo, saxaafadu waa in aanay baahin natiijooyinka aan rasmiga ahayn, mala-awaalka ah, ama been abuurka ah, si ay u marin habaabiyaan bulshada.

16. Saxaafaddu waa in ay adeegsataa taxadar badan marka ay tebinayso kiisaska ku jira maxkamadaha, ee aan wali Ia go'aamin, si ay uga taxadaraan in ay dhaawacaan geeddi-socodka dhagaysiga maxkamadda. Balse taasi looma tafsiiri doono in ay xakamaynayso xaqa ay saxaafaddu u leedahay in ay ka warbixiyaan dhagaysiga dacwadaha maxkamadaha ka socda marxalaha ay marayaan.

17. Arrimaha ku lugta leh dhibaato iyo tacsii qof soo gaadhay, waa in waydiimaha iyo habka loo waraysanayaa noqdaa mid naxariisi ku jirto oo dhibta Ia dareemi karta dhibanayaasha.

18. Saxaafaddu waa in ay ka qayb gashaa nidaamka wacyigelinta bulshada si ay codbixiyayaashu u helaan go'aan xog-ogaalnimo ku dhisan oo ay ugu codeeyaan murashaxiinta ay rabaan.

19. Wariyayaashu waa in aanay isku dayin in ay warka ku helaan iyada oo isticmaalaya hab sir ah sida kamaradaha qarsoon ama qalabka wax lagu dhagaysto.

20. Saxafiyiintu waa in aanay u dabaal-degin natiijada doorashooyinka. Waa in ay u tabiyaan hab xaqiiqo ku dhisan kana taxadaraan in ay hoos u dhigaan

(yaraystaan) xisbiyadda ama musharixiinta aan guulaysan hab wax u dhimi kara nabadda iyo amniga dalka.

### **XUQUUQDA IYO RABITAANKA SAXAAFADDA EE XILLIGA DOORASHADDA:**

1. Dhammaan saxaafadda Ia ogolaaday waa in ay galaangal macquul ah u yeelan karaan habraaca doorashooyinka iyo ka-qayb galayaasheeda, kuwaas oo ay ku jiraan maamulayaasha doorashada, goobaha doorashada, murashixiinta iyo codbixiyayaasha.
2. Waxa lagama maarmaan ah in saxaafaddu galaangal u yeelato xogta dawladda.
3. Saxaafaddu waa in ay awooddaa in ay warbixinteeda iyo daraasadeeda ku samayso deegaan ka bad-qaba cabsi-gelin iyo aargoosi.
4. Saxaafaddu waa in ay xor u noqotaa in ay daboosho kana warbixiso dhacdooyinka ololayaasha, doorashooyinka iyo doorashadda ka dib hab ku dhisan xaqiiqo iyo sugnaansho.
5. Saxaafaddu waxa ay xor u tahay in ay abaabusho barnaamijyada iyo doodaha Ia xidhiidha doorashooyinka.
6. Saxaafaddu waa in ay awooddaa in ay si xor ah dalka oo dhan u tagi karto si ay ula socoto ololaha doorashooyinka ee Xisbiyadda qaranka ama murashixiinta una eegto sida maamulka doorashooyinku uu uga shaqaynayo goobaha doorashooyinka.
7. Dhamaan saxaafada waa in loola dhaqmaa si isku mid ah, ha noqoto saxaafada gaarka loo leeyahay ama ta dawladda. Tani waxa ay khuseysaa galaan-galka ay u leeyihiin xisbiyada siyaasada, murashixiinta, goobaha doorashada iyo xogta.
8. Maamulka dawladda, xisbiyadda siyaasadda iyo ciddii kale ee ay khuseysaa waa in ay ka waantoobaan in ay faro-geliyaan arrimaha saxafiyiinta iyo shaqaalaha kale ee saxaafadda iyaga oo ujeedadoodu tahay in ay saameeyaan doorashooyinka ay wadaan KDQ.
9. Si loola dagaalamo wararka been abuurka ah, natiijada doorashada waa in Ia soo saaraa waqti ku haboon loona siiyaa si siman dhamaan saxafiyiinta si looga hortago natiijooyinka mala-awaalka ah.

10. Saxaafadda ajaanibka ah ee ka hawl-gelaysa Somaliland waxa ay leedahay baahin balaadhan oo muhim ah, iyo dhagaystayaal waxana ay saamayn kartaa codbixiyayaasha. Sababtaasi awgeed, adeegyadaasi waa in lagu dhiirigeliyaa in ay ka warbixiyaan ololaha doorashada ee Somaliland hab qoto dheer leh, iyaga oo tixgelinaya xeerarkooda anshaxa ee ku saabsan tebinta doorashooyinka iyo xeerkan anshaxa saxaafada ee Somaliland.

11. Komishanka Doorashooyinka Qaranka waxa lagu dhiirigelinayaa in ay la socdaan tebinta warbaahinta ee diiwaangelinta codbixiyayaasha iyo doorashooyinka ee saxaafadda dibadda iyo in ay sameeyaan hab lagula shaqayn karo oo lagu xaliyo cabashooyinka ka yimaada. Si looga taxadiro wararka kutirikuteenka ah ee ku saabsan natiijooyinka doorashooyinka, iyada oo la raacayo Shuruucda Somaliland ee Doorashooyinka, saxaafada waa in la siiyaa natiijada hordhaca ah, ee heer qaran oo ay siiyaan Komishanka Doorashooyinku.

### **MASUULIYAADKA SAXAAFADDA WAQTIGA CODBIXINTA IYO MUDDADA KA HOREYSA:**

Saxafiyiinta Somaliland waxa ay dhaqangelin doonaan Qodobada Xeerkan Anshaxa ee soo socda waqtiga doorashooyinka ka horeysa, waqtiga doorashadda iyo doorashadda ka dib:

Saxaafaddu waxa ay balan qaadaysaa:

1. In ay tabiso ololaha doorashooyinka, muddada codaynta iyo doorasada ka dib una tebiso hab cadaalad ah, dheeli tiran isla markaana dhexdhexaad ah, kana madhan buunbuunin iyo u xaglin cid gaar ah.

2. In ay hubiso in warku dheeli-tirnaado noqdo dhexdhexaad isla markaana ku salaysnaado xaqiiqda markaa taagan, ee ku jira waraysiyadda iyo doodaha kuwaas oo saamayn ku keeni kara maanhagaha (attitude) cod-bixiyayaasha.

3. In ay ka digtoonaadaan in ay siiyaan tabin dheeraad ah ama xad-dhaaf ah xisbiyadda ama murashixiinta qaarkood ama muxaafidka ha noqdaan ama mucaaridka ba.

4. In aanay bixin farriimo doorasho oo dhinac u xaglinaya muddada doorashada, gaar ahaana, maalinta ka horaysa cod-bixinta, si loogu ogolaado codbixiyayaashu in ay go'aankooda ku gaadhaan si xor ah iyaga oon cadaadis saarnayn ama aan dareemayn nooc kasta oo uu yahay.

5. Ina suurto-gal ah, in ay si toos ah usoo tebiyaan aragtida murashixiinta iyo xisbiyada siyaasiga ah iyaga oo hadalkooda sidiisa usoo daynaya, oo aanay soo dayn iyaga oo la jar-jaray, si loo marin habaabiyo bulshadda ama iyaga oo qof kale sharaxayo. Haddii aanu hadalku xanbaarsanayn deel-qaaf, nacayb, iyo kicin dadweyne, oo wax u dhimi karta amniga iyo xasiloona dalka.

6. In ay damaanad qaadaan xaqa murashaxu ama xisbiga siyaasiga ahi u leeyahay in uu si deg-deg ah u jawaab-celiyo, haddii sidaa loo baahdo, si xuquuqdaasi loo isticmaali karo muddada lagu jiro ololaha doorashada.

7. In uu hubiyo in xogta warku tahay mid xaqiiqo ahaan sugan, dhamays tiran, nuxur ahaan khuseysa isla markaana waaqaca ku dhisan.

8. In ay isticmaalaan erayo dhexdhexaad ah oon dhinacna u xaglinayn, tabinta warbixinaha doorashaduna noqdaan qaar aan ku dhisnayn caaddifad iyo laab-lakac kana taxadiro erayada farsammo iyo tira-koobka isla markaana hubiyo in ciwaanka warku ka tarjumayo xaqiiqada iyo xogta gudaha ee warku xanbaarsan yahay oo aanu ahaan wax is khilaafsan.

9. In ay ka dheeraadaan in uu kiciyo/huriyo dareenka caadifadaysan ee arrimaha lagu muransan yahay isaga oo arrimahaasi si caadifadaysan u gudbinaya taas oo dhib ka dhalan karto.

10. In la kala saaro aragtida iyo fasiraada qofka, kuna koobo aragtida iyo faaladda tafatiraha qaybta tafatiraha iyo bogga rayiga iyo barnaamijyadda.

11. In uu wixii xayaysiis ah si cad u muujiyo isla markaana aanu ku dhex darin warka isla markaana hubiyo in baahinta dacaayaddu waafaqsan tahay Xeerka Anshaxa ee Saxaafadda ee ay wada qaateen Saxaafadda iyo Komishanku Doorashadu.

12. Saxafiyiinta waxa waajib ku ah in ay isbaraan qofka daacadna ka noqdaan kana caddaalad sameeyaan habka warka ay ku helayaan, u tabinayaan iyo qaabka ay usoo gudbinayaan.

13. In ilaha warka doorashooyinka ku koobnaado ilaha rasmiga ah ee Komishanka Doorashooyinku masuulka ka yihiin.

14. In aanay wax ka bedelin sawirada iyo muuqaalada si ay bulshada u marin habaabiyaan.



15. In aanay ka qaadan wax saamaynaya shaqadiisa qof siyaasi ah ama murashax.

16. In aanay qadarka laga qaadayo wararka iyo Barnamijyada kala duwin Xisbiyada oo midna aanay qiime jaban siin (qiime dhimis) midna u diidin midna aanay wakhti badan sii dayn midna in yare e ay wakhti isku mida siisaa.

17. Saxafiyiinta iyo saxaafadu waa in aanay ka hor dhicin natiijada diiwaangelinta codbixiyayaasha iyo doorashada isla markaana aanay ka soo xigan natiijadda cid kale oon ahayn Komishanka Doorashooyinka Qaranka, taas oo abuurka karta xasilooni darro iyo kalsooni darro.

18. Saxaafadu waa in aanay soo gudbin shirarka jaaraa'id ee shaqsi lagu aflagaadaynayo ee bulshada dhexdeeda ka abuuraya nacayb sida qabyalada, cayda shakhsiga ah.

19. Muddada doorashada saxaafadu waa in aanay gudbin wararka cidi u yeedhiso ama dano dhaqaale ha dhaafsadan ama dan qabiil ha dhafsadan waxaana waajib ah in wararka saxafigu gudbinaya noqdo mid si xor ah oo madax banaan uu ku helay kuna dhisan xaqiiq isla markaana waafaqsan anshax wanaagsan iyo akhlaaqda suuban, ee mihnadda saxaafada laga doonayo, waana in uu warkaasi noqdaa mid bulshada wax taraya oo aan dhibi ku jirin.

## **MASUUUYADDA WARBAAHINTA DAWLADDA**

1. Dastuurka JSL qodobkiisa 32aad, faqradiisa 1aad iyo 3aad, iyo si wafaaqsan qodobka 94aad ee xeerka guud ee doorashooyinka iyo diiwaangelinta codbixiyayaash, iyada oo la tixraacayo Wareegtada Wasaarada Warfaafinta, Dhaqanka iyo Wacyigelinta ee Tixraaceedu yahay **WDH&W/XWKX/86/09/2020**, Warbaahinta Dawladda sida Raadyow Hargaysa, TVga qaranka, iyo jaraa'idka dawladdu gacanta ku haysaa, xisbiyadda qaranku waa u siman yihiin, waana in ay siiyaan bed, iyo waqti is-leeg ololaha xisbiyadda siyaasadda ee rasmiga ah;
2. Komishanka Doorashooyinka Qaranku isaga oo arrintaasi kala tashanaya Wasiirka Wasaaradda warfaafinta iyo Wacyigelinta, iyo xisbiyadda waxa uu dajin doonaa shaxda muddaysan ee loo qoondeeyay sii deynta ololayaasha xisbiyadda qaranka ee kaltanka warar iyo barnaamijyadda, shaxdaasi waa qayb muhim ah oo ka mid ah Xeerkan Hab-dhaqanka;

3. Shaxda muddaysan ee loo qoondeeyay sii deynta ololayaasha xisbiyadda qaranka, waxa Komishanka Qaranku soo saari doonaa ugu yaraan 7 (todoba) cisho ka hor bilawga ololaha doorashada ee Xisbiyadda Qaranka.
4. Guddida Ilaalinta Xeerka Hab-dhaqan saxaafaddu waxa ay si maalinle ah ula socon doonaan barnaamijyadda laga sii daayo Raadyow Hargeysa, TVga Qaranka iyo jaraa'idka dawlada si ay u hubiyaan in ay si dhexdhexaad ah, oo dheelitiran xisbiyadduna u siman yihiin usoo dayaan barnaajiyadooda, waxaanay warbixintooda siin doonaan KDQ;

### **GUDDIDA ILAALINTA XEERKA HAB-DHAQANKA SAXAAFADA:**

1. Saxeexayaasha Xeerkan Hab-dhaqan waxa ay isku raaceen in la abuurdo Guddida Ilaalinta Xeerka Hab-dhaqanka Saxaafadda ee Muddada ololaha iyo doorashooyinka isku sidkan ee Golaha Wakiilada iyo Golaha Deeganka, si loo dhaqangesho Xeerkan Hab-dhaqan ee saxaafadda, loona abuurdo guddi kormeerta si loo hubiyo fulintiisa loona gudbiyo bulshada iyo dhinacyaddaba in ay raacaan.
2. Guddida Ilaalinta Xeerka Hab-dhaqanka Saxaafaddu waxa ay ka kooban tahay 7 xubnood, oo ah aqoonyahano reer Somaliland oo ka kala iman doona: a) Laba wakiil oo ay soo magacaabaan Ururka Saxafiyiinta ee SOL JA; b) Laba wakiil oo uu soo magacaabo Wasiirka Wasaaradda Warfaafintu; c) Hal wakiil oo ka socda ururka Saxafiyiinta Dumarka ee WIJA; d) Laba xubnood oo uu Komishanku ka soo magacaabo qareenadda iyo aqoonyahanka dalka;
3. Komishanku marka uu helo magacaabista xubnaha sare ku xusan, isla markaana hubiyo in ay yihiin dad ku sifoobay dhex-dhexaadnimo, oo buuxiyay shuruudaha u dejisan, waxa uu si rasmi ah u shaacin doonaa magacaabista Guddidan.
4. Haddii xubin Guddida loo magacaabay uu Komishanku ku qanci waayo, iyaga oo sababaynaya waxa uu ka dalban doonaa cidda soo magacooday in ay sida ugu dhakhsaha badan usoo bedelato, isla markaana waafaqdo shuruudaha u yaala.
5. Xubnaha Guddida Ilaalinta Xeerka Hab-dhaqanka Saxaafaddu waa in ay ku sifoobaan dhex-dhexaadnimo, daacadnimo, hufnaan, isla markaana waa in aanay xubin firfircoon ka ahayn xisbiyada tartamaya;

6. Xubnaha Guddidu waa in aanay noqon mulkiilayaasha rugaha saxaafada, iyo tafatirayaashooda isla markaana waa in aanay xil ka haynin hay'adaha warbaahineed ee ay ka tirsan yihiin mid dawladeed iyo mid madax banaan ba.

7. Xubnaha Guddidu waxa ay iska dhex dooran doonaan Guddoomiye, Guddomiye kuxigeen iyo Xoghaye;

8. Xubnaha Guddidu waxa ay noqon doonaan shakhsiyaad dhexdhexaad ah, khibrad leh si ay u hubiyaan in Xeerka Anshaxa Ia fuliyo cabashooyinka Ia baadho una daabacaan natijadooda.

9. Guddidu waxa ay iskood u kuurgeli doonaan qaabka ay u shaqayso saxaafada dawladda iyo mida gaarka loo leeyahay ba waqtiga doorashada waxana ay warbixinta gungaadhkooda siin doonaan Komishanka Doorashooyinka todobaad kasta hal mar, ama kolba sida loogu baahdo inta uu socdo ololaha doorashadu.

10. Guddidu waxa ay si joogto ah xog ku saabsan sida dhinacyadu ugu dhaqmeen Xeerka Anshaxa u siin doontaa Komishanka Doorashooyinka.

11. Guddidu waxa ay yeelan doontaa xafiis ay hawshooda iyo kulamadooda ku qabsadaan, isla markaana u saamaxaya xil-gudashadooda.

12. Guddidu waxa ay kulmi doonaan muddada diiwaangelinta codbixiyayaasha socdo, doorashada ka hor iyo doorashada ka dib si ay u hubiyaan in kormeerkoodu u noqdo mid dheeli tiran oo dhexdhexaad ah si loo wanaajiyo xidhiidhka u dhaxeeya, dawlada, saxaafadda iyo Komishanka Doorashooyinka Qaranka iyo in ay tallo-bixin siiyaan.

13. Guddidu waxa ay tala-bixin ka gaysan doonaan habka loo suurtoogelin karo doodaha khuseeya in si firfircoon loo adeegsado Xeerka Saxaafadda, Xeerkan Anshaxa taas oo ay ku jiraan qodobada baahinta khuseeya.

14. Guddidu waxa ay tala-bixin ka gaysan doonaan qaabka loo xakamaynayo warbaahinta xisbiyadda u gaarka ah, sida bogooda internetka iyo warbaahinta bulshada (social media), muddada ololaha doorashda iyo ku-dhawaaqista natijadda doorashda.

15. Saxafiga ama rugta saxaafadeed ee ku gefta qodobada Xeerkan, waxa ay guddidu ka dalban doontaa in ay iskood u saxaan.

16. Guddidu waxa ay soo saari doontaa bulshadana usoo bandhigi doontaa warbixinta todobaad leh ah, oo ku saabsan sida saxaafadu ugu dhaqantay Xeerkan Anshaxa muddada doorashooyinka, iyaga oo magac dhabi kara saxaafada ama rugaha saxaafadeed ee ku gafa Xeerka Anshaxa.

17. Cid kasta oo ku gefka Qodobadda Xeerkan Anshaxa, isna sixi wayda marka sidaa ay ka dalbado cida ka cabanaysa ama Guddidu, talaabadda ku haboon ee laga qaadayo waxa loo raaci doonaa Xeerka Saxaafadda (Xeer Lr. 27 /2004), iyo Xeerka Guud ee Doorashooyinka iyo Diwaangalinta Codbixiyaasha (Xeer.Lr.91/2020) iyo xeerarka kale ee dhaqan galka ah. **KOMISHANKA DOORASHOYINKA JSL:**

**XUBNAHA MATALAYA SAXEEXAYAASHA XEERKANI WAXA AY SAXEEXEEN MAANTA OO AY TAARIIKHDU TAHAY=**

**1. KOMISHANKA DOORASHOYINKA QARANKA :**

**ENG. Eng. Cabdirashiid Maxamoud Cali** \_\_\_\_\_

**Guddoomiyaha Komishanka Doorashooyinka Qaranka.**



**2. WASAARADDA WARFAAFINTA IYO WACYIGELINTA:**

**C/nasir Cumar Jaamac** \_\_\_\_\_

**Wasiir Ku/xigeenka warfaafinta & wacyigelinta.**



**3. URURKA SAXAFIYIINTA EE SOLJA:**

**Sakariye Axmed Muxumed** \_\_\_\_\_

**Guddoomiyaha Ururka Saxafiyinta Ee SOLJA.**



**4. URURKA SAXAFIYIINTA EE WIJA:**

**Yaasmin Axmed Yuusuf** \_\_\_\_\_

**Guddoomiyaha Ururka Saxafiyinta Ee WIJA.**

